

Pe unitât di Glesie tal Friûl

Dôs peraulis o crôt che a coventin par spiegâ cheste Messe di usgnot che, come che o savês, la celebrin pe unitât di Glesie tal Friûl.

La prime reson di cheste celebrazion di usgnot, e je la setemane di preieris pa la unitât dai cristians, che si fâs un pôc in dut il mont, tant catolic, che protestant, che orientâl.

Ancje se o rivin cualchi an in ritart, nus à semeât talmentri naturâl che, in ocasion di cheste setemane di preiere par che i cristians a scomencin a intindisi e a jessi dutune, no si dismenteassin, in non di cheste grande unitât, de nestre plui piçule unitât. Parcè che al è un fat, no lu ai inventât jo, no lu vês inventât voaltris, al è un fat che, se o lin a viodi cemût che si cjatin dal pont di viste de unitât di Glesie in Friûl, si inacuarzin di jessi fats a tocuts e a tininins, che nancje a fâlu a pueste no si lu fasarès compagn. O scuen tocjâ cualchi fat. ...

Cussì, par esempli, la diocesi di Concuardie si cjate in provincie di Vignesie e te regjon venite; la mari Aquilee si cjate in provincie di Udin e in diocesi di Gurize; Sapade si cjate in diocesi di Udin e in provincie di Belum. Jo mi domandi se si podeve fâ a fruçons di plui di cussì.

E alore ce si fasial? O crôt che a un cristian il prin pinsîr che i ven tal cjâf al è chest: la preiere tantis voltis e servîs plui par chel altri mont che no par chest, ma la prime robe e je propit di domandâ a Diu che si visi di nô, e che al torni a dânus dongje seont chês idee che al veve cuant che nus à clamâts ae fede midiant di Ermacure e Fortunât o di cui par lôr, tai secui indaûr. O pensi che, propit preant pe unitât concrete de glesie nestre, o din une man ae unitât di dutis lis glesiis.

Parcè che al è stramp (no cjati une altre peraule) bacilâ pai grancj problemis di ducj e no viodi i propriis, che a son il claput, il modon necessari par fâ la cjase grande.

* * *

O crôt po che e sei ancje une altre reson di clarî sul cont di cheste Messe.

O vês sintût a dî che, in chest an culî a Udin, a tignaressin un congrès eucaristic che al à un titul ben precîs: "Eucaristie e Comunitât locâl".

A viodi ben, a cjalâ cuntun voli sclet e net, si inacuarzisi che, cuant che a fevelin di comunitât locâl, no san ben di ce che a vuelin fevelâ. Si tratial dome de diocesi di Udin o ancje de diocesi di Gurize e di Pordenon? E je une robe naturâl che no ai fate jo, come che o disevin, ni voaltris.

Il Cristianisim, pardut dulà che si è plantât, nol à creadis lui lis comunitâts, lis à cjatadis, e, là che lis à cjatadis, al à cirût di insedâ in chês comunitâts il Spirt di Crist. E culî, nô o vin vude une sorte, forsit, uniche in Europe. O vin vût che tal secul sest, dopo il 568, il vescul di Aquilee che par dret o no dret, (al sucêt simpri cussì, al è sucedût compagn a Costantinopoli e di altris bandis), al à cjàpât sù il non di patriarcje. E al è stât propit il patriarcjât che nol à cjatade la comunitât chenti, ma adiriture le à fate, parcè che i furlans a son furlans par vie de diocesi patriarcjâl. E à durât fin tal 1751. E je une unitât vere. Dal 1751 al è sucedût un fat grâf: il patriarcjât di Aquilee al è stât scancelât; no par cantins di religjon, che alore jo ju sopuartarès, ma par cantins di politiche. Come che a disevin in chês volte, par cantins di "rasons di stât", par vie che a jerin in cusion Marie Taresie di Austrie cu la Republiche di Vignesie. E nô, o vin paiât i conts di lôr doi. Il patriarcje di chês volte, Delfin, al è muart di scopecûr cualchi an dopo, e al è stât sapulît te glesie di Sant Antoni, dongje dal palaç dal Arcivescul di Udin.

Di in chel moment, a son nassudis dôs arcidiocesis: chês di Udin e chês di Gurize. Ma graciant Idu la unitât e je restade istès.

* * *

Alore jo mi dîs: podîno domandâ a Diu, isal mâl domandâ a Diu, che nus dei la gracie di tornâ a jessi unîts in che stesse glesie come une volte te ete dai patriarcjis?

Mi ven un pinsîr, une tentazion che me lassais dî. Cualchidun al pues dî: si trate di robis dal passât, indaûr no si torne. Se jo no vuei tornâ indaûr, o vuei la indenant vuê. A mi mi par che la Glesie ancje tes sôs "struturis", come che a disin cumò, e devi jessi gjenuine; par jessi gjenuine bisugne che lis struturis, lis sôs diocesis e lis sôs comunitâts a sein il plui pussibil reâls. E alore fasinlis reâls. E stant che la unitât e je, lassinle, parcè che o crôt che al zovi pastoralmentri. In fonts, lis divisions no son stadis fatis par resons pastorâls, ma par altris cantins.

E alore, la robe plui naturâl e je che di rivolzisi prin di dut a Diu, e mediant di Diu ai oms par che a capissin che une robe dal gjenar no je dome un ricuart dal passât, no je dome une fieste, une robe de storie, che pûr e je une grande robe e nô o sin fis de nestre storie; si trate invezit di creâ lis cundizions par une pastorâl serie, fonde e, o torni a ripeti chê peraule di prin parcè che mi plâs, gjenuine.

E mi lassais dî une altre robe. Al è un sierâ i voi, par no viodi ce che al sucêt, credint che la religjon cumò, ancje tai nestris paîs e tes nestris citâts culi in Friûl, e sei come prin. O starès par dî che la crisi e je plui dai predis che de int. Mi domandi: ce isal di fâ? Jo o varès une rispueste; le tenti, e voaltris cjapaitle come il parê di un che al pues sbaliâ e che, massime tal fâ une analisi de situazion religjose de sô int, al pues induvinâle e al pues sbaliâle. Jo o crôt che e mancji gjenuinitât.

A un ciert pont, taie di ca, fruce di là, si sin dismenteâts de gjenuinitât de religjon de nestre int.

A un ciert pont no savìn plui in ce ambient e cemût che al è stât insedât il Spirt di Crist in cheste int; a un ciert pont si sin lassâts cjapâ de retoriche, e, parcè no, disin, ancje dai interès che no son dome chei religjôs.

E alore si è pierdude la gjenuinitât de religjon dal popul dulà che si veve di insedâlu.

E lis consequencis tantis voltis no vegnin tun colp: al passe un secul, a 'nd passin doi, ma al rive un grop e si paie dut. Jo o crôt propit che al coventi il coragjo, cu la storie in man e cu la situazion di vuê in man, cuntun spirit libar e cence buzaris, di tornâ a cirî la gjenuinitât de nestre fede. E cjalait che la gjenuinitât de nestre fede o tornin a cjatâle, dulà? In chei che le àn fondade.

Propit in chei agns di cumò, int no nestre, e sta scuvierzint un grant nestri vescul da la antighitât, un grant pari, un grant predicjadôr de Glesie: Cromazi di Aquilee.

O vin bisugne, no di tornâ indaûr, ma di tornâ a bevi de aghe gjenuine che e je stade puartade chenti de fede, par podê tornâ a jessi autenticementri predis gjenuins, insedâts tal nestri popul. Parcè che se no, al è automatic che il Cristianisim e la religjon a diventin une robe foreste pal nestri popul.

Chescj i miei pinsîrs.

Jo sincerementri mi auguri che, volont celebrâ un Congrès Eucaristic intitulât "Eucaristie e comunitât locâl", chei che lu celebraran, ancje se a son chei che a àn lis responsabilitâts massimis te glesie, a tegnin cont di chest fal. E come che a àn fat di altris bandis, se al è alc di justâ, che lu justin; se al è alc di domandâ perdon ae storie, che lu domandin. O crôt che Crist al è vignût domandânus cheste robe prin di dut, par che la sô peraule e jentri te nestre anime.

"Metanoete", si dîs in grêc: in furlan, "mendaitsi". E culi a son robis di mendâ.

Alore si che al pues diventâ pardabon un Congrès Eucaristic che al fevele de comunitât locâl parcè che al è gjenuin che Crist nol à plantât un sôl vescul, ma tancj vescui, tancj che a 'nt covente, pes comunitâts umanis che a son in chest mont.

E, come che o viodês (e o finis cun chest), al jere tant naturâl che o disessin usgnot la Messe par furlan, par vie di ce che us ai dite.

Udin, 22-01-72 (Madone di Gracie)